

Ad ejus nutum sunt Præsules *Almeria* & *Guadicensis* vel *Guadianus*; olim etiam *Accitanus*; nam quæ olim *Accitana Colonia*, hodie *Guadix* nuncupatur. Quintus *Valentinus*: cui suffragantur *Carthaginensis*, *Origuel-*
la, *Segorbiensis* (vel *Segobricensis* a *Segobrica*, quæ nunc *Segorbia*) & *Balearium Majoris*. Sextus est *Tarraconensis*; obtemperant illi Præsules *Ilerdensis* (vulgo *Leridæ*) *Dertosanus* vel *Tortosa*, *Herlua*, *Barcinonensis*, *Gerun-*
densis, *Urgellensis* & *Vicquensis*. Septimus denique *Casaraugustanus*: eum in sacris agnoscunt *Pampilonensis* *Calagurritanus*, *Oscensis* & *Balbastiensis*. Nulli subsunt *Leonensis* & *Ovetensis*. Habet & tres Archiepiscopos *Portugallia*, *Bracarensem*, *Olisiponensem* & *Funchalensem*; subque iis Episcopos *Eborensem*, *Viseensem*, *Guar-*
denssem, *Conimbricensem*, *Portensem*, *Lamecensem*, *Silvensem*, *Septensem*, *Lerensem*. De reliquis Episcopa-
tibus consulendus *Vasæus*, loco quem indicavi. His omnibus, ut & Abbatibus, Monasteriisque quanti-
sint annuatim redditus, notant curiose *L. Marinæus Siculus*, *Damianus a Goës*, & alii. Ad statum Ecclesia-
sticum pertinent etiam fidei Inquisitores, in Sarracenos, Maranos & Iudæos primum creati, qui lapsu tem-
poris vires suas & auctoritatem extendere cœperunt in omnes quibus alieniores ab Ecclesia Romana mentes.
Habeat & locum hic Notatio Academiæ; quæ in Hispania circiter viginti duæ numerantur: interque eas
primi loci *Salmanticensis*, *Complutensis*, *Conimbricensis*, *Pincianensis*, *Saguntina*, *Oscensis* & *Ilerdensis*. Hispani
felices ingenio, infeliciter discunt; semidocti doctos se censent. Sophistarum Astus plus satis amant. In Aca-
demiis Hispanice magis quam Latine loqui gaudent: voces etiam Maurorum non paucas admiscentes. Suos
fœtus ingenique monimenta ad posteritatem raro, rarius ad Exteros, ob linguæ defectum, producant. Fue-
runt tamen, suntque hodie non vulgariter docti, qui præclara eruditione lectissimisque scriptis patriam illu-
strarunt, variisque operibus apud remotissimos etiam clariorem fecerunt. Si Theologi postulantur: pro-
dibunt *Vigilius Presbyter Barcinonensis*; *Aquilius Severus*; *Prudentius*, Episcopus Armentia: *Osius Cor-*
dubensis, *Avitus Presbyter*, *Marcianus*, Episcopus item *Barcinonensis*, *Paulus Orosius*, *Pacianus*, ejusque
filius *Dexter*, *Audentius*, *Isidorus*, *Apocalypseos Interpres*, *Iustinianus*, *Valentinae Ecclesiae Antistes*; *Lean-*
der Hispalensis Episcopus: *Martinus*, Præsul *Mandovenis*: *Fulgentius*, Episcopus *Carthaginensis*: *Eladius*,
Archiepiscopus *Toletanus*: *Isidorus*, Episcopus *Hispalensis*: *Ioannes*, *Gerundensis Præsul*: *Eutropius*, *Val-*
entinus Antistes: *Franciscus Ximenes Cardinalis* & Archiepiscopus *Toletanus*, Academiae *Complutensis* pa-
ter, qui variis linguis sacra Biblia, *Complutensium* appellatione notissima curavit imprimenda; & alii. Si Ca-
nonici Iuris periti: *Bernardus Compostellanus*: *Raymundus de Pennya Forti*: *Hugo Barcinonensis*. Si Iuris-
consulti; *Calixtus* III Pontifex *M. Fortunius Garcia*, *Gomeffius*, *Didacus Covarruvias*, silentioque minime
prætereundus *Antonius Augustinus*, domo *Casaraugustanus*, XII vir Romæ Stlit. Iudicandis, inde vero ex
Allifano & *Ilerdensi Episcopo*, *Tarraconensis Archiepiscopus*, vir Romanarum Antiquitatum & melioris
literaturæ peritissimus. Si Medici, licet non patrii, sed instituti: aderunt *Avicenna*, *Averrois*, *Rasis Alman-*
cor, *Messiahallah*. Si Historici: *Trogus Pompejus*, *Iustinus*, & alii. Si Philosophi, *L. Annaeus Seneca*, ejusque
filii, *Seneca Novatus* & *Mela*, *L. Iunius Moderatus Columella*: *C. Iulius Hyginus Sotion*: *Ioannes Vives*
Valentinus

Academia.

Bonarum artium
studiis celebres
viri.